

CONVENIO DE COLABORACIÓN ENTRE A VALEDORA DO POBO E A AXENCIA PARA A MODERNIZACIÓN TECNOLÓXICA DE GALICIA PARA A COMPARTICIÓN DE SISTEMAS DIXITAIS PARA A PRESTACIÓN DE SERVIZOS

Santiago de Compostela, na data da sinatura dixital.

REUNIDOS

Dunha parte, D^a. Dolores Fernández Galiño, Valedora do Pobo, segundo nomeamento efectuado por Resolución do 31 de xullo de 2019 (DOG do 1 de agosto), actuando en nome e representación da Institución en virtude dos poderes outorgados pola Lei 6/1984, do 5 de xuño, da Valedora do Pobo, con CIF S6500009C, e sede na Rúa Hórreo nº 65, CP 15700, de Santiago de Compostela (A Coruña).

Doutra parte, D. Julián Cerviño Iglesia, director da Axencia para a Modernización Tecnolóxica de Galicia (en diante Amtega), actuando en nome e representación da dita Axencia, en virtude das facultades conferidas polo Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos, modificado polo Decreto 9/2021, do 21 de xaneiro, polo que se suprime o Centro Informático para a Xestión Tributaria, Económico-Financeira e Contable (CIXTEC) e se modifica o Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos e o Decreto 149/2022, do 1 de setembro, polo que se nomea director da Axencia para a Modernización Tecnolóxica de Galicia.

Ambas as partes recoñécense capacidade e representación suficientes para formalizar o presente convenio de colaboración, e na súa virtude

EXPOÑEN

Primeiro.- Que a Valedora do Pobo é un órgano previsto no artigo 14 do Estatuto de Autonomía de Galicia e definido legalmente como a alta comisionada do Parlamento de Galicia para a defensa, no ámbito da Comunidade Autónoma, dos dereitos comprendidos no Título I da Constitución, e dos dereitos individuais e colectivos emanados do Estatuto de Autonomía, en especial os sancionados no seu título preliminar. Tamén garante o sometemento pleno das administracións galegas á lei e ao dereito e exerce as demais funcións que lle atribúe a Lei 6/1984, do 5 de xuño, da Valedora do Pobo.

Segundo.- A Lei 16/2010, do 17 de decembro, de organización e funcionamento da Administración



xeral e do sector público autonómico de Galicia, na súa disposición adicional terceira, autorizou a creación da Amtega, axencia pública autonómica que foi creada mediante o Decreto 252/2011, do 15 de decembro, modificado polo Decreto 9/2021, do 21 de xaneiro, polo que se suprime o Centro Informático para a Xestión Tributaria, Económico-Financeira e Contable (CIXTEC) e se modifica o Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos. Este decreto regula tanto as súas competencias e funcións como a súa organización e estrutura, o réxime do seu persoal, o réxime económico-financeiro e patrimonial, así como os principios que a orientarán na súa actuación.

O artigo 1 do referido Decreto sinala a Amtega como axencia pública autonómica que ten por obxecto a definición, o desenvolvemento e a execución dos instrumentos da política da Xunta de Galicia relativa ás tecnoloxías da información e comunicacións, así como a innovación e o desenvolvemento tecnolóxico.

Terceiro.- Que a Lei 40/2015, do 1 de outubro, de Réxime Xurídico do Sector Público establece, no seu artigo 3, entre os principios xerais das Administracións Públicas, entre outros, a racionalización e axilidade dos procedementos administrativos e das actividades materiais de xestión, así como os de cooperación, colaboración e coordinación entre as Administracións Públicas.

Cuarto.- Que a Lei 4/2019, do 17 de xullo, de administración dixital de Galicia, regula no seu artigo 118 o "Catálogo dos sistemas dixitais", no que se recollerán as aplicacións, os sistemas de información e as infraestruturas tecnolóxicas que utilizan ou se poñen a dispor dos órganos e entidades do sector público autonómico para o seu funcionamento interno, para a prestación de servizos á cidadanía e para a relación con outras administracións.

Quinto.- Que a Lei 4/2019, do 17 de xullo, de administración dixital de Galicia, regula no seu artigo 129 a posta a dispor dos elementos do "Catálogo dos sistemas dixitais" que pola súa situación tecnolóxica ou características funcionais estean en disposición de ser utilizados ou reutilizados por outras administracións públicas, órganos estatutarios, organismos e entidades do dereito público vinculados ou dependentes daquelas, ou polas universidades públicas do Sistema Universitario de Galicia, que poderán adherirse ao seu uso.

Sexto.- A Valedora e a Amtega, para garantir o mellor servizo aos intereses xerais, pretenden a formalización do presente convenio de colaboración no desempeño das tarefas de interese público que lles corresponden, cada unha actuando no marco das súas competencias.

Así, A Valedora require a colaboración e a asistencia instrumental da Amtega mediante a prestación



por esta, do acceso aos elementos do Catálogo dos sistemas dixitais a disposición dos órganos e entidades do sector público autonómico e das administracións públicas ubicadas no territorio galego e os elementos tecnolóxicos necesarios para o funcionamento dixital. A Amtega, de acordo coa normativa expresada, ten competencia para esta colaboración e apoio instrumental á Valedora.

O presente convenio de colaboración, polo tanto, busca a eficiencia na prestación dos servizos públicos e a realización das tarefas de interese público que lles corresponden ás partes cos medios persoais, técnicos, materiais e de calquera outro tipo dos que dispón o sector público autonómico.

En virtude do exposto, as partes acordan outorgar o presente convenio de colaboración conforme ás seguintes

CLÁUSULAS

Primeira.- Obxecto.

O presente Convenio ten por obxecto establecer as bases da colaboración entre a Valedora e a Amtega, para a compartición dos sistemas dixitais que se recollen no Anexo I deste convenio, dentro dos que forman parte do "Catálogo dos sistemas dixitais" postos a dispor dos órganos e entidades do sector público autonómico e das administracións públicas.

Segunda.- Ámbito de aplicación.

As aplicacións e sistemas para o funcionamento dixital son o conxunto de solucións e infraestruturas informáticas necesarias para a dispoñibilidade dos procesos e servizos dixitais, que estandarizan e solucionan partes ou a totalidade do procedemento dun servizo electrónico.

No Anexo I a este Convenio recóllense os elementos do "Catálogo dos sistemas dixitais" que se poñen a disposición no ámbito deste convenio. No dito Anexo I indícase tamén a modalidade de utilización que se establece.

Mediante addenda a este convenio poderanse incluír no Anexo I novos elementos do "Catálogo dos sistemas dixitais" ou modificar as modalidades de uso.

En función das condicións e situación das aplicacións ou sistemas, estes poderán poñerse a dispor en diversas modalidades: reutilización da aplicación, posta a dispor do seu uso, utilización compartida, e aquelas outras que en cada momento poidan ser de interese.



Terceira.- Compromisos da Amtega.

A Amtega prestará os servizos en materia das tecnoloxías da información e das comunicacións de acordo co que dispoña o Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus Estatutos, modificado polo Decreto 9/2021, do 21 de xaneiro, polo que se suprime o Centro Informático para a Xestión Tributaria, Económico-Financeira e Contable (CIXTEC), o contrato plurianual de xestión da dita axencia e os correspondentes plans de acción anuais.

A Amtega porá a disposición da Valedora do Pobo :

- o acceso ás aplicacións ou sistemas que forman parte do ámbito deste convenio;
- a información técnica e de uso que sexa precisa para o correcto uso dos sistemas.

O nivel de prestación dos servizos e actuacións da Amtega levarase a cabo con arranxo a un plan de acción anual, baixo a vixencia e de acordo co pertinente contrato plurianual de xestión.

A prestación de novos servizos ou a ampliación dos actualmente existentes requirirá da formalización da correspondente addenda a este convenio, onde necesariamente figurarán as condicións necesarias para levalos a cabo.

Cuarta.- Compromisos da Valedora.

A Valedora comprométese a:

- Colaborar e prestar a asistencia que requira a Amtega no cumprimento das obrigas establecidas neste convenio.
- Facer un uso axeitado dos sistemas e servizos comúns do Catálogo dos sistemas dixitais postos a disposición da Valedora, recollidos no Anexo I e necesarios para o funcionamento dixital.
- Cumprir coas especificacións técnicas e condicións de uso das solucións e infraestruturas incluídas no presente convenio.
- Levar a cabo as actuacións necesarias dentro da súa Institución, no exercicio das súas



competencias, para a posta en marcha dos sistemas incluídos no presente convenio que desexen utilizar, así como das posibles evolucións dos mesmos.

- Facilitar, aos órganos da Amtega, a comprobación das condicións de uso e da implementación dos requisitos técnicos necesarios para os sistemas incluídos no presente convenio que se desexen utilizar.

Quinta.- Financiamento.

As actuacións previstas no presente Convenio non xerarán custos nin darán lugar a contraprestacións financeiras entre as partes, e polo tanto, non precisa consignación orzamentaria.

Sexta.- Comisión de seguimento.

Para velar polo cumprimento do estipulado, constituirase unha comisión paritaria de seguimento da execución do convenio, formada por dous representantes da Amtega e dous representantes da Valedora, que actuará como órgano de vixilancia, seguimento e control do establecido neste convenio, promovendo, se o considera adecuado, outras actuacións que poidan enriquecer o seu desenvolvemento.

A composición da dita comisión será a seguinte:

- Pola Amtega, dous representantes con rango mínimo de Xefe de Departamento.
- Pola Valedora, o Secretario Xeral da Institución ou persoa na que delegue, e o Vicesecretario Xeral ou persoa que a substitúa.

Ao final de cada anualidade a Comisión de Seguimento xerará un informe do estado e cumprimento anual do obxecto do presente convenio.

Sétima.- Medios humanos e materiais.

A Amtega, co obxecto de garantir a adecuada execución das actuacións deste convenio, comprométese a asumir a dirección, organización e xestión dos traballos, para o que dispón da estrutura e servizos técnicos suficientes, facéndose responsable da súa calidade técnica. A Amtega, procederá, en consecuencia á asignación de medios humanos e materiais que sexan necesarios para as indicadas funcións. Sen prexuízo da súa dirección, organización e xestión dos traballos, a Amtega



poderá contratar as subministracións e os servizos externos que sexan necesarios para a súa realización material, cando non conte cos medios precisos para levala a cabo. Estes contratos someteranse sempre ao establecido na lexislación de contratos do sector público.

No caso de cesión de datos, a entidade contratada cumprirá as esixencias do artigo 13 da Lei orgánica 3/2018, do 5 de decembro (BOE 06/12/2018) de protección de datos persoais e garantía dos dereitos dixitais, adoptándose tanto as medidas de seguridade técnicas como organizativas.

Oitava.- Vixencia.

O presente convenio producirá os seus efectos dende a data da súa sinatura por tódalas partes e terá unha vixencia de catro anos, podendo acordarse polas partes unha prórroga de catro anos máis.

Novena.- Modificación, denuncia e causas de resolución.

Este convenio poderá ser modificado por acordo das partes, a través da formalización da correspondente Addenda.

Sen prexuízo do establecido na normativa vixente, serán causas de resolución do presente convenio as seguintes:

- Acordo unánime do tódolos asinantes.
- Incumprimento total ou parcial dalgunha das estipulacións que o regulan.
- Transcurso do tempo estipulado sen que se culminen as actividades acordadas.
- Denuncia unilateral de calquera das partes previa comunicación á outra parte con tres meses de antelación.

Décima.- Protección de datos.

As partes comprométense a respectar as previsións contempladas no Regulamento (UE) 679/2016 do Parlamento Europeo e a Lei orgánica 3/2018, do 5 de decembro (BOE 06/12/2018) de protección de datos persoais e garantía dos dereitos dixitais, adoptando cantas medidas resulten necesarias para cumprir as súas previsións e, en particular, para garantir a seguridade e integridade dos datos persoais e dos dereitos dixitais e, a súa protección fronte a alteracións, perdas, tratamentos ou



accesos non autorizados.

Serán de aplicación todos os dereitos e obrigas derivados da normativa aplicable en materia de protección de datos e garantía dos dereitos dixitais.

Undécima.- Inexistencia de relación laboral.

A subscrición do presente convenio non implicará relación laboral, contractual ou de calquera outro tipo entre os profesionais que realicen as actividades obxecto deste convenio e a Valedora do Pobo.

A subscrición do presente convenio non implicará relación laboral, contractual ou de calquera outrotipo entre os profesionais da Valedora que realicen as actividades obxecto deste convenio e a Amtega, e viceversa.

Décimo segunda.- Natureza do convenio, resolución de conflitos e xurisdición.

O presente convenio ten natureza administrativa e os seus efectos rexeranse polo establecido nas súas estipulacións.

Respecto da Valedora do Pobo, como órgano estatutario previsto no artigo 14 do Estatuto de Autonomía de Galicia e ao abeiro da disposición adicional vixésimo segunda da Lei 39/2015, do 1 de outubro, do procedemento administrativo común das Administracións Públicas, seralle de aplicación a súa normativa específica, no marco que inspiran a actuación administrativa de acordo coa citada Lei.

Doutra banda, aínda que é un dos negocios xurídicos excluídos do ámbito da aplicación da Lei 9/2017, do 8 de novembro, de Contratos do Sector Público, segundo se especifica no seu artigo 6, ao non previsto aplicaráselle os principios recollidos na citada Lei, co fin de resolver as dúbidas e omisións que puideran presentarse.

Mediante a firma do presente convenio, as partes comprométense a resolver de mutuo acordo no seo da Comisión de Seguimento os incidentes que poidan xurdir no seu cumprimento.

As cuestións litixiosas que xurdan entre as partes durante o desenvolvemento e a execución do presente convenio e que non poidan ser resoltas pola Comisión de Seguimento someteranse á xurisdición contencioso-administrativa conforme ao disposto na Lei 29/1998 do 13 de xullo, reguladora da xurisdición contencioso-administrativa.



Décimo terceira.- Publicidade e inscrición en rexistros.

A sinatura deste convenio suporá o consentimento expreso para incluír e facer públicos os datos referidos ao convenio, de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 19/2013, do 9 de decembro (BOE 10-12-2013), de transparencia, acceso á información pública e bo goberno e co Decreto 126/2006, do 20 de xullo, polo que se regula o Rexistro de Convenios da Xunta de Galicia.

As partes asinantes outorgan o seu consentimento para que os datos persoais e o resto das especificacións que constan neste convenio sexan publicados no Portal de Transparencia e Goberno Aberto e no Rexistro de Convenios da Xunta de Galicia, de acordo co establecido no artigo 15 da Lei 1/2016, do 18 de xaneiro, de transparencia e bo goberno, no Decreto 126/2006, do 20 de xullo, polo que se regula o Rexistro de Convenios da Xunta de Galicia, e en concordancia cos artigos 14 e seguintes da Lei 19/2013, do 9 de decembro, de transparencia, acceso á información pública e bo goberno e ademais na web institucional da Valedora do Pobo.

En proba de conformidade co seu contido, as partes asinan telematicamente o presente convenio de colaboración.

A Valedora do Pobo de Galicia

O director da Axencia para a Modernización
Tecnolóxica de Galicia

María Dolores Fernández Galiño

Julián Cerviño Iglesia



ANEXO I

ÁMBITO DO CONVENIO: ELEMENTOS DO CATÁLOGO DOS SISTEMAS DIXITAIS PARA OS QUE SE ESTABLECE ESTE CONVENIO

1) Notifica.gal

O sistema de notificacións electrónicas de Galicia Notifica.gal é o servizo que permite á cidadanía, empresas e administracións públicas recibir, de forma áxil e sinxela, as notificacións electrónicas enviadas pola Xunta de Galicia ou por calquera outra administración pública galega adherida a este sistema. Con este servizo, calquera cidadán pode solicitar, de forma voluntaria, que se lle remitan de forma electrónica as notificacións administrativas

Modalidade de uso: Adhesión á utilización do servizo dispoñible.

2) Plataforma de intermediación de datos e documentos PasaXe!

A plataforma de intermediación PasaXe!, administrada pola Amtega como nodo de interoperabilidade, presta funcionalidades comúns para o intercambio de datos e documentos entre o sector público autonómico e o resto das administracións públicas. O intercambio realízase nunhas condicións tales que garanten a seguridade da información e a protección dos datos persoais que se transmitan, proporcionando medidas para a autenticidade, confidencialidade, integridade, dispoñibilidade e trazabilidade adecuadas á natureza daqueles.

O Catálogo dos servizos de interoperabilidade inclúe todos os servizos de consulta de datos e documentos accesibles a través da plataforma, así como as súas condicións de acceso.

Modalidade de uso: Adhesión á utilización do servizo dispoñible.

3) Rexistro Electrónico Xeral de Apoderamentos

O Rexistro Electrónico Xeral de Apoderamentos de Galicia (REAG) permite ás persoas físicas e xurídicas outorgar poderes a outros/as cidadáns/ás ou entidades para actuar no seu nome nas relacións ante as administracións públicas. Pódese outorgar un apoderamento de maneira



presencial a través das oficinas de atención á cidadanía e de rexistro ou tamén de forma telemática.

Modalidade de uso: Adhesión á utilización do servizo dispoñible.

4) Plataforma de contratos de Galicia

Emprego do perfil do contratante existente na plataforma de contratos de Galicia que integra toda a licitación da Comunidade Autónoma de Galicia, en cumprimento da Disposición adicional terceira da Lei 20/2013, do 9 de decembro, de unidade de mercado que indica que deben estar interconectadas todas as plataformas de contratación.

Modalidade de uso: Adhesión á utilización do servizo dispoñible.

5) Plataforma de licitación electrónica Silex

A plataforma de licitación electrónica da Xunta de Galicia que permite a creación de expedientes, a presentación de ofertas e a celebración de mesas de contratación.

Modalidade de uso: Adhesión á utilización do servizo dispoñible.

6) Plataforma de xestión de expedientes de contratación Plation

O Xestor de Expedientes de Contratación da Xunta de Galicia que permite a tramitación de expedientes de contratación, a creación de fluxos de tarefas, a xestión de trámites, a emenda de documentos, a exportación de expedientes, sinatura dixital, etc.

Modalidade de uso: Adhesión á utilización do servizo dispoñible.

7) SEF Sistema electrónico de facturación

O Sistema Electrónico de Facturación (SEF) é o Punto Xeral de Entrada de Facturas Electrónicas da Comunidade Autónoma de Galicia, así mesmo, é unha plataforma que permite a unha entidade usuaria a consulta e tramitación das facturas que os provedores presentan de xeito electrónico nesta plataforma, así como rexistrar electronicamente as facturas que se reciben en papel.

Modalidade de uso: Adhesión á utilización do servizo dispoñible.

